



Unnuinermut akitsuut pillugu Inatsisartut inatsisissaattut siunnersuut

(Aningaasaqarnermut Akileraartarnermullu Naalakkersuisoq)

(Siullermeerneqarnera)

Naalakkersuisumut qujanaq siunnersuuteqarneranut.

Demokraatinut pingaartuuvoq, takornarianit aningaasanik isaatitsinissarput, avatangiiserput kusanartorsuaq misigiumallugu maannartunit, aammali ima pingaaruteqartigaaq, uagut nunatut avatangiisitta paarilluarnissaa, kusanartorsuarmik misigineqartuurtinniarlugu.

Tassunga atatillugu ilalernartipparput unnuinermut akitsuummik takornarissamut ataatsimut atulersitsisoqarnissaa tamangajammi kommuninut tuttussamik, piumasaqaatigalugu aningaasat takornariaqarnermut atorneqassasut. Iluarisimaarparput, maani nunaqartut unnuinermut akitsuummik akiliisinneqartassanngitsut, tassungali atatillugu apeqqutigerusullugu, qanoq soorlu kalaallit ilinniagaqartut Danmarkimi maani nunaqartutut imaluunniit takornarissatut isigineqartassanersut? Isumaqatiginavianngilarput, kalaallit ilinniagaqartut nunani allani takornarissatut isigineqassasut. Allatuulli nunaqqatigaagut aammalu assersuutigalugu Inatsisartunut qinersinermut qinersinnaatitaapput.

Unnuinermut akitsuummik tunngatillugu, Naalakkersuisut apererusuppakka misissorneqarsimanersaq, ornitani, nunani allani, unnuinermi akitsuusersuisimasuni takornarissat ikilinerannik maluginnittoqarsimanersaq aammalu taamaassimappat ikileriarnerat qanoq annertutigisimanersaq?

Isummerfigisariaqarparput, uagut Kalaallit Nunaanni takornarissanit orninneqartartunut assigisunut unammillertutut inissisimagatta. Ajornarpiangilaq atuisutut akinik sanilliussinissaa, taamaattumillu apeqquterujussuanngorpoq unnuinermut akitsuutip takornariartussaraluagut ornitanut unammillikkatsinnut illikartiinnassanerigut. Taassuma isiginneriaatsip misissornissaa pingaaruteqarpoq.

Takornarissat ikinnerusut akitsuusiinerup kingunerisaanik kissaataanngilaq, tassani isertitanut sunniissammata piffinni inuussutsissarsiortut isertitaannut soorlu assersuutigalugu kaffisorniartarfinni neriniartarfinnilu misigisassarsiortitsisunullu angallassisartunut.

Siunnersuut taamatut oqaaseqaatitalerlugu Aningaasaqarnermut- aamma Akileraartarnermut ataatsimiititaliami suliareqqinneqartussatut innersuunneqarpoq.